

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 13 JULAI 2020 (ISNIN)

SOALAN

DATUK IGNATIUS DARELL LEIKING [PENAMPANG] minta **MENTERI PERDAGANGAN ANTARABANGSA DAN INDUSTRI** menyatakan status semasa Persidangan APEC 2020 sama ada Persidangan Kemuncak APEC 2020 masih mengikut jadual dan apakah matlamat-matlamat APEC 2020 yang telah dikenal pasti.

JAWAPAN

Tuan Yang di-Pertua,

1. Untuk makluman Ahli-Ahli Yang Berhormat, terdapat tiga (3) pertanyaan berhubung penganjuran APEC 2020. Ianya merangkumi status dan usaha-usaha yang diambil bagi menganjurkan APEC 2020, matlamat-matlamat yang ingin dicapai sebagai tuan rumah termasuk Matlamat Pasca Bogor dan sama ada Persidangan APEC boleh dijadikan tarikan kepada anggota ekonomi APEC untuk melabur di Malaysia. Oleh itu, izinkan saya menjawab secara serentak kepada pertanyaan daripada:

- I. YB Penampang untuk sesi pada hari ini (soalan no 8);
- II. YB Sibu untuk sesi pada 16 Julai 2020 (soalan no 12); dan
- III. YB Bangi untuk sesi pada 24 Ogos 2020 (soalan no 7).

Tuan Yang di-Pertua,

2. Bagi pertanyaan berhubung status Persidangan APEC 2020 dan matlamat-matlamat APEC yang telah dikenal pasti, sepertimana diutarakan oleh YB Penampang, ketidaktentuan akibat penularan COVID-19 telah memberikan impak yang besar kepada perancangan Malaysia sebagai penganjur mesyuarat-mesyuarat APEC sepanjang tahun 2020. Walau bagaimanapun, Malaysia terus tekad melaksanakan tanggungjawab dan amanah sebagai Pengerusi APEC bagi tahun ini. Dalam hal ini, Malaysia telah mengambil langkah-langkah proaktif bagi meneruskan program-program kerja APEC dengan mengguna pakai format persidangan secara maya atau digital di peringkat Kumpulan Kerja dan Pegawai-Pegawai Kanan APEC.

3. Malaysia telah berjaya menerajui rundingan di kalangan anggota ekonomi APEC serta memuktamadkan Kenyataan Menteri-Menteri Perdagangan APEC mengenai COVID-19 secara maya sepenuhnya. Kenyataan yang dikeluarkan pada 5 Mei 2020 ini membuktikan keupayaan Malaysia dalam menjayakan Keberhasilan APEC secara maya.

4. Malaysia, dengan sokongan padu anggota ekonomi APEC, sedang giat meneruskan pelaksanaan agenda APEC 2020 yang berlandaskan konsep Kemakmuran Bersama (*Shared Prosperity*) selari dengan tema "*Optimising Human Potential Towards A Future of Shared Prosperity*" yang telah dipersetujui oleh anggota ekonomi APEC. Tema ini bermatlamat untuk mewujudkan kerjasama yang seimbang dan adil di kalangan ekonomi APEC ke arah pembangunan yang lebih inklusif.

5. Pencapaian paling utama bagi penganjuran APEC 2020 adalah penghasilan Visi Pasca-2020 APEC yang dipimpin oleh Malaysia selaku Pengerusi APEC 2020 dan akan dilancarkan oleh para Pemimpin APEC pada hujung tahun 2020. Visi baharu APEC ini sedang dirangka bagi menggantikan Matlamat Bogor yang akan berakhir pada tahun ini. Visi baharu ini akan menjadi panduan jangka panjang kepada anggota ekonomi APEC dan akan menjadi satu sumber rujukan utama dalam melaksanakan inisiatif-inisiatif ekonomi di rantau Asia Pasifik.

Tuan Yang di-Pertua,

6. Sukacita saya memaklumkan tentang status perbincangan visi baharu ini yang akan menggantikan Matlamat Bogor. Malaysia sedang giat menganjurkan sesi perbincangan, libat urus dan mesyuarat bersama anggota ekonomi APEC, ahli akademik dan wakil industri secara berterusan bagi merangka Visi Pasca-2020 APEC. Pada bulan Disember 2019 dan Februari 2020, dua mesyuarat khusus secara fizikal bersama Pegawai-Pegawai Kanan APEC dan satu sesi dialog bersama pemegang taruh berkenaan Visi Pasca-2020 APEC telah dianjurkan. Bagi memastikan visi baharu ini dapat dimuktamadkan dan dilancarkan pada penghujung tahun ini, MITI meneruskan beberapa siri perbincangan dan mesyuarat-mesyuarat berkaitan penyediaan dokumen penting ini di peringkat Pegawai-Pegawai Kanan secara maya di sepanjang tempoh Perintah Kawalan Pergerakan (PKP). Perbincangan tersebut turut melibatkan beberapa mesyuarat dua hala antara Malaysia dan anggota ekonomi APEC.

7. Malaysia juga sedang menimbangkaedah penganjuran yang terbaik dan berkesan bagi Sidang Kemuncak Pemimpin-Pemimpin Ekonomi APEC pada penghujung tahun ini bersesuaian dengan situasi pasca pandemik COVID-19. Visi Pasca-2020 APEC akan dilancarkan semasa Sidang Kemuncak ini.

Sekian, terima kasih.